



大清穆宗繼天開運受中居正保大定功聖智誠孝信敏恭寬  
毅皇帝實錄卷之八十三

同治二年癸亥十月甲午諭內閣前因直東等省交界處所  
賊蹤紛竄靡定特命劉長佑督辦三省勦匪事宜茲據劉長  
佑奏稱直東豫三省交界地方現已肅清請撤去督辦等語  
直東股匪經僧格林沁會同劉長佑閻敬銘勦除殆盡即照  
劉長佑所請毋庸督辦三省勦匪事宜直隸山東河南交界  
地方如尚有零匪出沒劉長佑仍當會合勦辦不得以現無  
督辦之責稍存諉卸閻敬銘張之萬亦不准因撤去督辦遂  
存畛域之見直隸總督久在軍營地方一切公事均關緊要

著劉長佑察看。如果省外布置業已周妥，卽行回省任事。將  
察吏安民詰奸弭盜一切應辦事宜，實心實力認真經理。以  
副委任。○諭議政王軍機大臣等，劉長佑奏吳永教在江北  
招募楚勇現已成軍，遵旨撥赴河南助剿，並請令吳再升馳  
赴河南會同吳永教統帶交張之萬調遣等語。吳再升係吳  
永教之兄，若令戴罪圖功，自更得力。著卽飭吳再升赴豫會  
同管帶募勇，並飛飭吳永教折赴張之萬軍營聽候調遣。張  
之萬於此項募勇到後，卽飭認真訓練，隨同進剿。吳再升等  
能否得力，並著隨時察看具奏。前命江長貴暫署直隸提督，  
當諭令劉長佑隨時察看，據實具奏。尚未據該督奏到。昨日

引見之前任湖北鄖陽鎮總兵訥欽一員，已降旨交劉長佑  
差遣。該二員孰為優劣，並著體察奏聞。毋稍瞻徇。將此由五  
百里各諭令知之。○又諭，憚世臨奏髮逆由粵竄楚，截擊大  
勝，餘匪散走粵黔，現籌防勦情形一摺。髮逆竄入富賀界內，  
與廣東相距不過二三百里，現在該省兵力萃於肇慶高州，  
若此股乘虛直入廣東腹地，深屬可虞。憚世臨現飭臬司張  
運蘭等軍由宜章橫出連山，扼賊東趨之路。卽著毛鴻賓、郭  
嵩燾督飭張運蘭等實力扼截，隨時與楚邊各軍互相聯絡，  
實力勦洗，杜其竄入江西之路。憚世臨嚴飭陳士杰、王永章  
等軍力遏回竄，毋稍疏虞。至分竄黎平之賊，憚世臨已飭周

洪印等分守沅靖各隘相機堵剿勞崇光張亮基務當督飭  
在事員弁迅速會合楚師力圖掃蕩包茅仙一股雖經金太  
文等圍剿疊勝而賊勢未衰並著勞崇光等嚴飭金太文等  
乘勝進兵盡殲醜類毋留邊陲之患李逆屢敗之後兇燄漸  
衰此次若不得逞志於東必將歸併潯州與黃逆合股著張  
凱嵩速派得力將弁迎頭截剿期與黔楚各軍三面兜圍迅  
圖蕨事不得稍有遲誤將此由六百里各諭令知之○以募  
勇滋事貴州總兵官滕正富革職訊辦○予廣西古城陣亡  
守備朱家福祭葬世職○蠲緩廣東信宜茂名化高明恩平  
鶴山羅定七州縣被擾地方未完額賦有差○乙未諭議政

王軍機大臣等據閩敬銘奏本年六月二十二日有上海高  
和順米船由江南余山口放洋北上駛至黑水外洋遇盜劫  
去貨物並捐米一百餘石拒殺水手鄭明瑞現由石島口岸  
放洋赴天津交兌等語海運米船近年經過東洋頗覺安靖  
何以黑水洋面忽有盜艇游弋肆劫現在京倉所需米石全  
賴海運源源接濟若不將洋面盜匪迅速撲滅不獨為米艘  
商船之害將來南糧北上亦在在可虞於倉儲甚有關繫閩  
敬銘現已咨會沿海各督撫一體兜拏即著曾國藩劉長佑  
李鴻章分飭舟師確探賊蹤協力勦捕並著閩敬銘嚴飭總  
兵李懋元迅督水師將弁認真巡緝務將此股盜犯悉數翦

除以靖洋面。儻該總兵陽奉陰違。或安坐衙齋。虛報出洋躡  
緝。卽著從嚴叅辦。毋稍寬縱。至此拏彼竄。原係該匪等慣技。  
况海面汪洋數千里。並無關隘。可以遏截盜蹤。必須南北各  
水師分巡合捕。方克有濟。曾國藩等務各檄飭沿海鎮將。嚴  
密捕拏。毋得稍涉大意。致滋延蔓。將此由四百里各諭令知  
之。○又諭張集馨奏。陝省各路逆匪紛竄。妥籌布置。省城安  
堵。漢南團勇截賊獲勝。請令蔣常垣等籌費練團。各摺片。前  
據多隆阿奏。藍屋失陷。該將軍已飛檄穆圖善。姜玉順兩軍  
前進。而自率各營。由興平一路督勦。茲據張集馨奏。多隆阿  
已於藍屋城外紮營。圍繞三市。賊不得遁。此股逆匪。輕裝遠

馳。人數無多。藍逆亦在其內。如能全股聚殲。卽可除一巨慙。  
著多隆阿卽督飭穆圖善等。剋期攻拔。毋任一名漏網。襄河  
留鳳節節空虛。並著多隆阿派兵聯團。實力守禦。以免逆匪  
乘虛竄入。山陽失守以後。未據李雲麟奏報。疊經諭令該京  
卿督兵攻克。著卽實力進攻。俟克復後。由興安一帶進勦。毋  
再延誤。該京堂以知兵自許。朝廷不惜破格錄用。乃前軍甫  
出。卽已潰敗。若不力圖振作。自問當得何罪。劉蓉身膺疆寄。  
責有攸歸。現在漢南一帶。賊勢猖獗。該撫自川起程。已逾數  
月。尚未抵陝。若必俟三省會勦。始由巴州前進。則陝南地方。  
日見糜爛。賊勢日見蔓延。以後更難著手。劉蓉當懍遵前旨。

趕緊部署入陝。相機勦辦。俾各路官軍有所繫屬。不至互相觀望。貽誤事機。方為不負委任。蓋屋距省較近。省垣防範。仍不可稍為鬆懈。著張集馨會同德興阿認真辦理。興安紳士蔣常垣等稟請於安康漢陰適中之地設局。攤糧辦團。既係該紳士等敵愾情殷。保衛鄉里。著准其設局興辦。惟按畝攤糧。須歸公正紳者經理。方免抑勒侵吞諸弊。該署撫仍當嚴飭該紳士等。不得假公濟私。致滋擾累。至刊發木質關防一節。與體制不符。礙難照准。將此由六百里諭知多隆阿。劉蓉。李雲麟。並傳諭張集馨知之。○補鑄福建延建邵道。湖北監利縣窰圻巡檢。各關防印信。從巡撫徐宗幹嚴樹森請也。○

以隨營奮勉。復山東降調知府王繼庭職。○丙申。諭議政王軍機大臣等。唐訓方奏。官軍進勦壽州。疊獲勝仗。勦撫兼施。情形一摺。李世忠一軍。由南岸進兵。業經攻克柏家圩。收撫民圩百餘處。茲復移師前進。距壽州十餘里。兩日之間。攻克逆圩二十餘座。殺賊四千餘名。收撫投誠各圩十餘處。實屬奮勉出力。著曾國藩即飭李世忠速將壽州攻拔。一面飭令蔣凝學。成大吉各軍。會合進攻。毋稍遲緩。紳練田端書等引眾二萬。向官效順。著富明阿。唐訓方。仍遵前旨。飭令進圖下蔡。以制蒙城賊勢。並著曾國藩檄令周寬世。毛有銘各軍。乘勢進攻。潁蔡一帶。各路同時並進。使苗逆應接不暇。勦辦當

易得手。李世忠俟攻拔壽城後，卽移軍西上，直擣下蔡老巢。與姚書田等練眾，並周寬世等楚軍，聯絡聲勢，將潁蔡一帶賊氛悉行掃蕩，俾苗黨退無所據。該逆自不難速就殲擒。李世忠頗能用命，著僧格林沁等多方激勵，令其益加奮勉，為國宣力。該提督統兵深入，並著曾國藩代籌後路布置。毋令賊匪抄襲蒙城濠外賊壘。業經英翰攻克其一，若再破一二壘，糧路卽可通運。陳國瑞亦連日猛攻，轟開賊營十餘丈，斃匪百餘名。勦辦甚為得手。惟蒙城待援情形十分危迫，而苗黨人數眾多，悉力抗拒。賊營急切難破。昨覽吳棠繪呈之圖，官軍包賊營外，搶築營盤，僅能遏截東北兩面，未能合圍。著

富明阿卽分軍進紮西南兩面，與陳國瑞聯絡聲勢，斷賊糧路。僧格林沁現已移軍赴皖，著卽馳往蒙城，嚴密布置，迅解城圍，以救倒懸。唐訓方現已進軍蚌埠，著卽將沿淮一帶賊圩，速行掃蕩，進規懷遠，力扼中權，以斷蒙壽賊勢。所有李世忠糧餉軍火，著唐訓方源源接濟。其陳國瑞所部軍餉火藥，仍由吳棠隨時撥解。毋令缺乏。將此由六百里各諭令知之。

○又諭張凱嵩奏石逆餘黨分竄楚黔粵各邊界，現飭追躡約會三省圍剿，並潯州逆黨紛竄橫州，勦辦情形各等語。李幅猷本石逆黨中著名悍賊，石逆被殲之後，率其餘黨分投竄擾。倏黔倏楚，轉徙靡常，並擾及粵東西各邊界。若令所至

寶鑑卷八十三  
六  
蔓延日久勢成流寇。轉益鳩張。勦辦更為費手。必須楚黔粵三省官軍會合。兜勦就地殲除。著勞崇光。張亮基。憚世臨。與毛鴻賓。張凱嵩等。嚴飭各該省帶兵文武。互相聯絡。探明賊蹤。前截後追。務令該匪不得喘息。此等亡魂紛竄之賊。尤須鄉團四面設防。俾賊所至無所擄掠。裹脅官軍得以會合。擊勦乃足制其死命。並著各該督撫飭各地方認真辦理。其由賀縣竄至開建之賊。毛鴻賓等督飭兩粵各軍乘勢殲除。該處客匪尚多未靖。毋令勾結為患。憚世臨仍飭楚邊各軍相機堵勦。潯州逆首黃三尚踞平天寨。負嵎死守。張凱嵩即飭劉坤一等速籌攻擣。容縣已經克復。其首逆范亞音逃往大

化等處。係屬何州縣地方。務須趕緊嚴行按捕。毋任渠魁漏網。致貽後患。其由潯分竄橫州之李亞得。甘汰然等股。並著張凱嵩飭令參將潘忠實等軍迅速掃除。漸次進圖南太等處之賊。以靖邊圉。橫永一帶亦與廣東欽靈毗連。總須兩省會合勦辦。信宜縣城諒已收復。高州餘匪。辦理如何。毛鴻賓等奏報當已在途。亟應乘此激勵兩省官軍。將高潯巨股一氣掃蕩。其餘零匪自可乘機次第殄除也。將此由六百里各諭令知之。○以廣西鬱林攻克賊巢。擢署知州王達材以知府用。○予山東臨清陣亡守備張化龍等祭葬世職。○丁酉諭內閣。都察院奏。熱河民人張嘉祿。遣弟張嘉宗。以刑偏翻



寶錄卷八十三  
供等詞。赴該衙門呈訴。此案張嘉祿呈訴伊父張舉被喀拉沁旗蒙古教莫海等圖財斃命。蒙古委員三勝嘎復令眾兇將屍身搶去。前據都察院兩次具奏。疊經降旨交春佑。麒慶提審定擬。茲據張嘉宗控稱。王府旗員不將二莫保得解審。僅有教莫海到案。惟據一面之詞。移稱該民人盜父屍骸。復有旗下當差之陳宗維。句串刑司丁書李太。刑偏干證姚福。疑及看屍人林喜翻供。旗員李連等。係眾兇親屬。延不解案。希圖草率擬結等情。案關圖財害命。及刑書等串通刑偏。亟應徹底根究。且係兩次降旨提訊之件。何得任意耽延。殊屬玩泄。著麒慶迅卽催提各犯。秉公嚴審。務得確情。按律定擬。

具奏原告民人張嘉宗。該部照例解往備質。○又諭光祿寺卿潘祖蔭奏。甘肅大吏。辦理軍務乖方。並鈔錄該處無名紳士信函一摺。前經御史丁壽昌奏。參布政使恩麟辦事顛預。曾經寄諭多隆阿。熙麟查參。嗣因熙麟以恩麟係伊族弟。奏請迴避。復改派慶昫。會同多隆阿查辦。茲據潘祖蔭奏。稱恩麟養寇病民。玩誤粉飾。濫保各款。與丁壽昌奏。參各情節。大略相同。其所遞甯夏並狄道河州各紳士信函內。並有牽訴慶昫辦理偏袒之處。該將軍既有牽涉之款。自應一體迴避。所有恩麟被參各款。並慶昫辦理漢回互鬪之案。有無偏袒情節。均著交多隆阿彙入前次交查之案。秉公確查。據實具

奏。母稍徇隱。已革提督成瑞。已革道員和祥。甯夏縣知縣彭慶章。被參各款。並著多隆阿一併嚴切查明。迅速覆奏。陝甘辦理軍務。但分良莠。不分漢回。疊經諭令帶兵大員。及地方大吏。勸撫兼施。持平妥辦。諒能懍遵。不至稍形偏袒。至九卿科道。原許其陳奏事件。惟潘祖蔭所遞甘省紳士信函。並無名姓。有類匿名揭帖。該紳士等。如果因時勢迫切。痛切肌膚。何難聯名具呈。向都察院控訴。若隱匿姓名。動輒向京卿科道私宅投遞。懇其代奏。恐各省紳士紛紛效尤。致啟告訐之風。不可不防其漸。潘祖蔭率據匿名信函。代為陳遞。實屬冒昧。不諳政體。著傳旨嚴行申飭。○諭議政王軍機大臣等。李

鴻章奏。官軍攻克澣關等處。進逼閭門。並蘇松等府州紳民捐租助餉。各摺片。澣關為閭門至無錫大道。援賊麇集西路。時與城賊往來策應。此次經程學啟等督軍攻克。蘇城陸路盡斷。賊勢已孤。李朝斌等復由五龍橋逼攻盤門。蹋平賊壘五座。李鴻章現親赴婁門調度。擬即分門進攻。是蘇城大有克復之機。覽奏深慰塵繫。惟現在忠侍各股。尚踞無錫東北之茅塘橋等處。雖澣關既克。勢難回援。而城賊既窮。難保該逆不拌死回救。以顧巢穴。著李鴻章一面飭令李鶴章等。攔頭截擊。以圖牽制。一面督同程學啟等軍。分攻各門。使該逆兩不相顧。以期名城迅復。早奏膚公。仍須穩慎將事。謀出萬

全不可稍有疏失。蘇城陸路既斷，若當官軍克復之際，誠恐該逆渡江北竄，或擾及鎮防，均不可不嚴為之備。都興阿、馮子材、魁玉，務各飭令水陸防師，嚴密布置，如敗匪紛竄，即行迎頭截擊，力圖聚殲，毋任鋌走。蘇郡各屬紳民呈稱收復地方各業戶，願於應收一半租息內，以三分之一報捐軍餉，又另提善後撫恤經費，豫備克復蘇城後用度，具見惻忱，惟地方新復，民困甫蘇，李鴻章惟當飭令所派委員，會同該紳董體察民生困苦情形，分別籌辦，不得稍有抑勒，以順輿情。將此由六百里各諭令知之。○又諭富明阿奏攻勦情形，添募勇丁，並請催吳崇協餉各摺片，富明阿一軍由渦河南北兩

岸進援蒙城，搶築營壘。陳國瑞一軍攻克李圩，英翰一軍於城西南各路斷賊糧運。該逆見我軍攻之愈力，拚死抗拒，日夜併力攻城。官軍於十月十五日將城河以南兩營退入城門，河北兩營為賊所踞，浮橋亦為所毀，賊復增添精悍，阻我進兵之路，致與城中聲息不通。蒙城危在呼吸，亟應設法援救。即著富明阿、唐訓方就現有兵力，與陳國瑞等軍聯絡聲勢，設法進援，派兵斷賊糧道，尤為目前要著。並著妥籌布置，僧格林沁已由河南省城起程，著懍遵前旨，迅督大軍星馳救援，力解蒙城之圍，以期轉危為安。捻首李大箇子相盤等現在竄往徐宿之間，四出焚掠，徐宿一帶為蒙營糧運必由

之路。該處如被匪梗塞。關繫實非淺鮮。富明阿業飭姚廣武帶領馬勇四百名。跟蹤追勦。並著吳棠派兵夾擊。妥籌兼顧。迅掃賊氛。以清餉道。富明阿擬於宿州一帶。添募勇丁一千名。惟苗逆詭謀百出。且與捻匪互相勾結。黨與眾多。該將軍在宿州等處募勇。萬一苗捻各逆陰遣死黨赴募。作為內應。一經墮其狡詐。勢必為該逆所乘。不可不豫為之防。富明阿務當酌量情形。出以慎重。妥籌辦理。不可稍涉大意。富明阿所稱八月間由揚州起程。糧臺支發餉銀軍火等項。支應亦俱無多。迄今五十餘日。未見續有報解。現將營中所屯之米。酌發接濟。存米一經發完。而協餉仍復不至。飢軍譁潰堪虞。

至軍火器械等項。需用尤急。請飭按月撥解等語。蒙軍勢形岌岌。若兵糧軍火更多缺乏。勢必立形決裂。大局何堪設想。著吳棠督飭喬松年。務將每月應解富明阿營糧餉軍火器械等項。按月如期撥解。如再稍涉遲逾。致誤戎機。必惟吳棠等是問。將此由六百里各諭令知之。○又諭富明阿等軍會攻圍蒙逆壘。該逆濠深壘堅。勦辦未能得手。亟應厚集兵力。以壯軍聲。庶可相機進取。該將軍所擬於宿州添募勇丁。新集之眾。恐難借資得力。現在直隸全境肅清。山東境內餘匪。該省兵力亦敷勦辦。所有直東兩省。從前調集添募之勇丁。自應隨時遣撤。劉長佑前派吳永毅赴滬添募之勇丁一千

名。並將希夷所部豫勇八百名。疊經諭令撥交張之萬調遣。現在蒙城攻勦喫緊。亟須添兵協助。著劉長佑。閻敬銘查明直隸山東軍營內。現在存營之勇。可以遣撤者。尚有若干名。即行遴委妥員。帶赴蒙城。交富明阿調遣。並酌量籌給勇糧等項。以利進行。吳永。蔣希夷所部勇丁。已先後撥赴豫省。並著張之萬查明。如兵力可敷防勦。即於前二項勇丁內。酌量分撥。派員管帶。赴蒙助勦。該督撫等接奉此旨。即行妥籌調撥。毋稍遲延。並一面奏聞。以慰塵繫。聞山東有遣散之勇。並未派員管帶回籍。致有騷擾。著閻敬銘查明。如有此項勇丁。迅即派員管帶。飭赴蒙城。以助兵力。將此由六百里各諭

令知之。○又諭總理各國事務衙門奏貴州教民一案。辦有端緒。請將田興恕就近羈禁。問擬完結。以免異議。一摺。田興恕殺害教民一案。前經降旨。將田興恕革職拏問。仍著勞崇光。張亮基。在黔審訊。乃事閱兩年。此案尚未經訊辦。田興恕赴川赴黔。亦迄無定議。茲據該衙門奏稱。接勞崇光等來函。以此案已與該處主教胡縛理商酌。該主教允致柏爾德密信函。有可使戍邊之語。惟不願田興恕再回黔省。似尚知中國辦案。不能違例科罪。又經總理衙門。與柏爾德密重加辯論。將中國定例。及田興恕屢逢恩詔。應行減等。並其罪名出入輕重。必應按照定章辦理各節。與之再三曉譬。始據該公

使聲稱止求就近在川訊辦。但田興恕並未監禁。必須監禁。後照中國例辦理。給予照會。寄知本國。即可完結等語。田興恕係奉旨拏問之員。無論在何處查辦。總應照例先行羈禁。若令在外逍遙。不惟無以服外國人之心。即中國亦安有此辦案之法。著崇實、駱秉章接奉此旨。即將田興恕設法查提到省羈禁。毋令疑懼遠避。致可以照中國律例完結之案。又生枝節。田興恕到省羈禁後。即著崇實、駱秉章迅速奏報。勞崇光、張亮基、懍遵疊次諭旨。速將此案即在黔省秉公查辦。按例定擬具奏。以便總理各國事務衙門照會住京公使。迅速了結。如不能將田興恕設法羈禁。或致令疑懼遠颺。滋生

事變。惟崇實、駱秉章是問。總理各國事務衙門摺一件。均著鈔給閱看。總之此案雖係中外交涉。不能不持情法之平。如能照外間主教及住京公使所議。按照中國律例了結。將來不至物議紛起。人心不服。則各該省教士即可永遠相安。所以保全中外大局者甚大。惟在崇實等體察妥籌。迅辦至此案。無論已結未結。均不准稍有傳播。致令不知輕重之人。造言生事。貽誤大局。如稍有傳播。亦惟崇實等是問。懍之慎之。將此由六百里各密諭知之。○又諭。本日據總理各國事務衙門奏。請將田興恕就近羈禁。問擬完結。業經密諭崇實、駱秉章、勞崇光、張亮基設法先將田興恕就近在川省羈禁。仍

由勞崇光張亮基妥為擬議完結。並由總理衙門將一切原委專函附致矣。此事柏爾德密接到胡縛理信函。經總理衙門向其詢問內有何語。旋據將信彙譯送。係將田興恕減死遣戍等事。均推柏公使主持。與勞崇光等譯寄之彙不符。惟不願田興恕回黔。意則相同。復經總理衙門將勞崇光等原函援引例意之處。代為切實透達。並告以田興恕屢次例應逢恩減等。照此來信。將田興恕發往新疆。不准援免。案可立結。該公使意漸活動。惟稱拏問之人。並未監禁。必須監禁後。照中國例辦理。給予照會。寄知本國。即可辨結。覈其前後情節。柏爾德密所稱。不願田興恕回黔。但願將其就近監禁。以

為拏問確據。報知本國。即可通融完案等詞。尚非虛假。似此辦案。既合中國之例。又得情法之平。斷不可再事遷延。致有藉口。本日已密諭崇實駱秉章。將田興恕設法就近在川羈禁。著勞崇光張亮基。一面將田興恕虐殺教民及被參之案。迅速妥為定擬。援引律例具奏。以服中外人之心。毋得稍有推諉觀望。或致事機中變。總理衙門密片一件。著鈔給勞崇光。張亮基閱看。再此次胡縛理信函。竟有傳說接到都中密寄各件。均屬未能慎密。此旨及鈔寄密片。止准勞崇光張亮基親自拆閱。此外雖委辦此案之員。亦不准一人與知。將來完案時。此二件毋庸覆奏。以免秉筆者洩漏。並毋庸錄寄川

省致有傳揚。儻機事不密。惟勞崇光。張亮基是問。接此旨時。並著查看印封。如有驛站拆動情形。卽據實查叅。拆看之人。以軍法從事。將此再由六百里各密諭知之。○以安徽攻克。渦河賊營。擢遊擊駱得勝。以副將用。千總康錦標。以守備用。並賞花翎。餘升賞有差。予陣亡遊擊李仕貴。祭葬。世職加等。○戊戌。以神靈顯應。加江西廣豐縣胡太保。封號曰靈佑。○諭議政王軍機大臣等。有人奏。錦州副都統恩合。辦理大凌河開墾馬廠荒地。將東廠歸併西廠。其東廠之地。責令甲兵分領。招佃取租。議論亦似妥善。惟甲兵所駐地方。或遠在數百里以外。礙難管業。且廠地遊民。一概不准承領。失業堪虞。

不如准令墾地民人。及附近各居戶。呈報領種。一律升科。統由地方州縣徵解報部。劃抵該處兵餉。至恩合籌辦開墾。創為甲兵分領之議。聽信佐領常貴。依勒通阿。劉三等。頗有招權納賄之謠。該副都統於查辦烏雲泰一案。復代為彌縫掩飾。請飭查辦各等語。恩合向來辦事。尚能認真。此次辦理開墾荒地。是否措置乖方。有無前項情弊。基溥。阜保。現已前赴錦州查辦事件。著將此次所叅各節。彙入前案。秉公查辦。據實覆奏。恩合前次叅辦烏雲泰等一案。是否公允。何以節次被人奏叅。其中有無別情。著一併詳細直陳。毋稍徇隱。另片奏。東馬廠既經裁撤。所出之地。較前不啻倍蓰。請准各旗開



散及附近民人一體承領等語。是否可行。並著基溥、阜保詳察情形具奏。原摺片著鈔給閱看。將此諭令知之。○又諭官文、嚴樹森奏。毫捻竄入鄂疆。經官軍勦擊。遁回豫境。全楚肅清。一摺。毫捻程大老坎等。由豫入鄂。圖竄漢鎮。經楚軍分道扼擊。退踞宋埠中館驛一帶。官文等豫調周鳳山一軍。扼紮黃郡。舒保督率各軍力戰。斬馘數千。該逆受創北遁。全楚肅清。而張總愚一股。又由唐鄧一帶窺楚。鄖陽及均州光化。勢甚喫重。著官文等飭令派出各軍。會合豫軍。將程大老坎一股奮力夾擊。毋任再行竄擾。程逆是否殲斃。並著查明具奏。張總愚一股。由南召南侵。擾及唐鄧。前經諭令張之萬飭令

在防將士。實力堵遏。並令張曜力顧西路。以杜紛竄。據該撫奏。已派兵分扼鎮平內鄉。何以此股逆匪。仍復擾及鎮平內鄉鄧州。足見平日所奏。全是紙上空談。毫無實際。張曜究竟現在何處。曾否與賊接仗。南召一帶團練。何以不能聯絡禦賊。毛昶熙係專辦團練之員。亦不得置身事外。著將近日賊情軍情。據實陳奏。捻匪假道於豫。以擾楚疆。久成輕車熟路。中州門戶洞開。以鄰為壑。毫無布置。實堪痛恨。著張之萬、毛昶熙、嚴飭張曜等。會同楚軍。前截後追。不得以賊氛出境。遂為了事。若任令程大老坎飽颺回巢。張總愚竄擾秦楚。必將該撫等重治其罪。決不寬貸。懍之慎之。鄖陽防務萬緊。道員

梁作楫一軍。無論行抵何處。官文等卽檄令就地駐紮。兼顧  
郎防。與歐陽正墉一軍。互相策應。以固邊圉。毋稍大意。將此  
由六百里各諭令知之。○以江蘇克復太倉等州縣城出力。  
賞知府李銘皖。副將黃登第等花翎。都司鄧國釗等藍翎。餘  
加銜升敘有差。○以湖北勦辦捻匪。全省肅清。賞副都統舒  
保。白玉搬指一箇。翎管一支。大小荷包各一對。委驍騎校依  
克吉善。阿克都善。巴圖魯名號。餘加銜升敘有差。予陣亡佐  
領壽長等十員。祭葬世職加等。並入祀死事地方暨各原旗  
籍昭忠祠。○己亥。諭內閣。向例理事同知。通判缺出。無論內  
地邊地。俱於保送記名之中書小京官筆帖式內。由吏部帶

領引見補授。惟奉天府所屬之昌圖廳。所轄地方遼闊。應否  
於理事通判外。添設官職較大之員。以資彈壓。抑或就理事  
通判一缺。酌量增改官階。及嗣後該廳員缺。應如何揀員升  
補調補。一切變通辦理之處。著吏部妥議具奏。○諭議政王  
軍機大臣等。王明等奏。賊竄昌圖界之榆樹臺等處。兵圍緝  
捕失利。調兵馳往勦辦一摺。景綸等奏。探聞昌圖盜匪。有欲  
進邊滋擾信息。派兵防堵等語。昌圖盜首滾地雷王五等。與  
朱家城子匪首齊秀等。互相勾結。有馬賊數百人。竄擾榆樹  
臺街內。佐領哈爾尚阿等。帶領馬隊兵圍進攻。被賊圍困。衝  
散。候補佐領慶吉。驍騎校文楷。照磨徐棠。均受傷落馬。不知

寶錄卷八十三  
下。落哈爾尚阿退至法庫邊門。該匪復在梨樹城等鎮肆擾。玉明等已添調官兵二千餘名。馳往勦捕。景綸等已派兵四百餘名。沿邊防勦。著玉明等嚴飭派出官軍。實力進勦。剋期歲事。毋任再有竄越。景綸等飭令佐領常喜等。會合和常等認真防堵。如該匪回竄朱家城子巢穴。卽飭竭力攻毀。毋留餘孽。昌圖賊匪滋擾。歷經控告有案。該將軍兼尹等。並不認真拏辦。任其蔓延。雖經民人楊華貴等呈控。於今秋七八月間。復起搶殺。何以未據該將軍兼尹等奏聞。及至寄諭詢問。始行陳奏。仍復含糊影射。並未將才寶善。白凌阿等匪據實聲覆。何以憤憤若此。豈真謂朝廷不能執法從事耶。此等小

醜倡亂。何至兵圍望風潰散。損將喪師。總由平日不能認真整頓。及至禍機已伏。猶復上下諱飾。不肯遽行勦除。積習相沿。實堪痛恨。此股匪徒。人數無多。現既添調兵丁。不難一鼓殲滅。如再任令蔓延。定將該將軍等從重治罪。決不寬貸。才寶善。白凌阿等。本係熱河滋事之匪。恐其復行回竄。著麟慶嚴飭所屬。一律防範。並傳諭蒙古各王旗一體兜拏。不得觀望隱匿。以期早日廓清。景綸另摺奏請養兵恤民一摺。所奏甚是。邊地緊要。嗣後自應停止徵調。該將軍等仍當隨時教練兵丁。休息民力。以固根本。將此由六百里各諭令知之。○又諭駱秉章奏。川省邊防喫緊。未能抽調兵勇赴甘。並李雲

寶錄卷八十三

麟一軍所需軍餉。請仍由湖北撥解。各一摺。陝南賊勢猖獗。自漢中郡縣淪陷後。該逆乘隙蔓延。不無窺伺川疆之計。川北防勦之師。必須嚴密周到。其與滇黔接壤處所。亦時虞寇蹤竄突。南北兼防。兵力已覺不厚。駱秉章現在添募楚勇。以資攻勦。所存各營兵勇。難以抽調赴甘。所奏均係實情。惟甘省既無知兵之將。又無得力之兵。而回燄日張。地方糜爛。情形日甚一日。若不得一二支勁旅。速往援勦。恐民團解體。匪勢披猖。以後更難收拾。著多隆阿遵照疊次諭旨。飭令雷正綰。迅將永壽境內賊巢。盡力掃蕩。乘勝赴甘。相機進勦。並著催令陶茂林。將沂隴餘逆。悉數殲除。剋期直達平涼。力圖收

復。熙麟、恩麟均有地方之責。豈可一籌莫展。坐待援師。著卽激勵諸軍。督同團練。將各路逆回。痛加勦洗。俾雷正綰、陶茂林兩軍聲勢益壯。則勦辦更易得手。多隆阿所部業已派撥二十營赴甘。近復調穆圖善、藍斯明等。進取藍屋山、陽兩城。且陝回尚未肅清。仍須分兵控勦。漢南軍情萬緊。多隆阿有不遑兼顧之勢。劉蓉身為陝撫。陝事是其專責。著卽懍遵前旨。迅速拔營前進。將陝南各營兵弁。極力整頓。收復漢南。被陷各城。以輔多隆阿兵力。所不逮。毋得以防守蜀境為辭。致滋玩誤。藍斯明前已進兵山陽。李雲麟現在駐紮何處。前日接仗失利。何以尚未會同劉蓉奏報。著卽會商藍斯明。合力

進勦迅圖克復。稍贖前愆。至漢南各營。業歸劉蓉部署。所需餉項。向川省撥解。與李雲麟無涉。李雲麟軍餉。自應仍由鄂省接濟。著官文嚴樹森隨時撥解。以利軍行。將此由六百里諭知官文。多隆阿。駱秉章。熙麟。嚴樹森。劉蓉。李雲麟。並傳諭恩麟知之。○命翰林院編修車順軌充

實錄館詳校官。○庚子。諭議政王軍機大臣等。理藩院奏。阿拉善蒙古官兵。應否裁撤歸旗遊牧一摺。據稱阿拉善旗赴援慶陽官兵。前經陝甘總督咨令全行撤回遊牧。復經甯夏將軍咨令紮營該旗之塘口。迤北聽調。現據阿拉善王貢桑珠爾默特。在該院呈報請示等語。此項官兵。本不得力。前經熙

麟奏請將全隊撤回。自毋庸再留於塘口。迤北備調。著慶昫。熙麟。卽行飭令該官兵撤回遊牧。以示體恤。將此由四百里各諭令知之。○又諭。馮子材奏。南路逆援。廣集現籌進勦情形一摺。金陵官軍。紮過孝陵衛。屢戰皆捷。乘勝攻克秣陵關等要隘。南路長圍漸合。鮑超一軍。亦從東壩溧水轉戰而前。疊經曾國藩奏到各情。與本日馮子材所奏略同。金陵賊勢窮蹙。蘇常各逆首。悉索死黨數萬。盡銳下援。分屯句容。丹陽。境內。以洪逆偽令。併力死守。鎮防近接丹陽。當上游掃蕩羣兇之時。自應乘此力振軍威。用資犄角。惟鎮防兵力未厚。而賊勢尚眾。該提督等。以賊情愈蹙。我兵舉動。尤當謀出萬全。

所籌甚屬周妥。著卽督令派出之總兵田宗揚等將挑備各營勁旅簡齊軍實。秣馬厲兵聽候進止。先將沿途賊壘設法剪除。分兵進紮辛豐。其餘各營扼守鎮城及雲臺寶蓋諸山。不得稍涉疏虞。一俟鮑超之軍由溧水進攻句容。卽令田宗揚等各營由辛豐滾營前進。規取丹陽。聯絡聲勢以收夾擊之效。此時金陵蘇州圍攻均可得手。各軍均當穩慎以圖萬全。鎮防距賊密邇。尤須防賊勢窮鋌走。並著馮子材等懍遵疊次諭旨。與都興阿南北兩岸嚴行備禦。仍隨時稟商曾國藩通籌戰守。以赴事機。將此由六百里諭令知之。○又諭前因鎮江軍營需餉甚迫。諭令廣東督撫將應解鎮江協餉不

論何項。先行趕解銀十餘萬兩。茲據馮子材等奏稱。此項協餉共應解銀六十餘萬兩。兩次委提僅據撥銀七千兩。鎮營上年閏八月整頓清理之後。按月儘攤儘放。現又積欠新餉四十餘萬兩。飢軍詳潰堪虞。請旨飭催等語。金陵漸次合圍。城賊窮極思竄。鎮江適當其衝。防勦極為喫重。若因餉需告罄。稍有疏虞。東南全局卽恐因之掣動。關繫實非淺鮮。著毛鴻賓郭嵩壽懍遵前旨。不論何項。先行趕解銀數萬兩。並酌量情形。無論多寡。按月定數撥解若干。俾得源源接濟。鎮江軍務現在極關緊要。儻該督撫任意遲延。致令餉項缺乏。貽誤戎機。恐毛鴻賓等不能當此重咎也。將此由六百里各諭

令知之。○辛丑。諭議政王軍機大臣等。有人奏。陪京重地。馬賊肆行一摺。據稱盛京省城附近。卽有匪徒結夥盤踞。往來行旅被劫者。層見疊出。承德開原廣甯甯遠等處。為尤甚。行旅受累不堪。各衙門摺差。劫去衣物者。亦復不少。請飭查拏等語。盛京一帶。馬賊橫行。擾害閭閻。為時已久。總由該將軍等不能督飭屬員。認真辦理。以致粉飾養癰。盜風愈熾。亟應嚴行緝捕。以除奸宄。而靖地方。著玉明。景霖。和潤。德椿。嚴飭所屬各衙門。不分畛域。協力緝拏。悉數弋獲。盡法懲治。並著議立緝限。嚴定處分。如有緝捕不能得力之員。卽著從嚴叅辦。捕盜乃地方官應辦之事。各該地方官。果能嚴飭差役。認

真躡緝。凡被劫之家。匪類窩聚處所。均可周知。該將軍等尤當嚴飭所屬。四出訪拏。並力行保甲。以清匪蹤。不准歸罪於被劫之家。及鄰右村店之不報。巧為諉卸。原摺著鈔給閱看。將此各諭令知之。○又諭。張之萬奏。皖捻由楚歸巢。並遏截張總愚股匪西竄。遣撤吳永。教募勇。調張學醇赴豫各摺片。皖捻程二坎。分股由楚回竄豫疆。經光山正陽息縣汝陽等處。兵團截擊。並經尹嘉賓一軍。由淮店扼截。敗匪全股遁出豫境。該逆雖經回巢。難保不糾集黨與。復行竄豫。著張之萬督飭在防將士。嚴密扼守。毋令再行竄入邊境。毛昶熙現駐歸郡防勦。歸陳邊境。是其專責。著卽督率兵勇。激勵團練。進

攻該逆老巢。俾匪眾不得乘間再行出巢他竄。毋稍玩誤。息縣餘匪尚踞正息交界之談家園一帶。著張之萬即飭李殿元王文行等軍迅速埽除。張總愚股匪竄撲鎮平內鄉淅川一帶。勢將擾及商雒。張之萬現雖分派兵勇赴西坪荆子關舊縣等處扼紮要路。惟山大林深。路徑叢雜。著該撫嚴飭地方文武分撥兵勇會合民團嚴密扼守。飭令張曜力遏險要。防其西竄。並著多隆阿派撥兵勇力扼商雒。毋令該匪竄入。劉蓉張集馨亦當檄令毗連豫境各州縣聯絡鄉團堵截。毋任與山陽一帶股匪勾合。此股賊匪如不能西竄。必將南趨楚境。官文嚴樹森務當督率襄樊防兵實力堵遏。並會合豫

軍夾擊。切勿稍分畛域。前因蒙城兵力不敷。諭令張之萬將吳永教蔣希夷所募勇丁派員管帶赴蒙助剿。茲據張之萬奏稱。接劉長佑咨。吳永教所部勇丁係在各處湊募。恐難得力等語。此項勇丁既毋庸留豫。亦毋庸赴皖。著即知會劉長佑檄令妥為遣散。其吳永教一員著張之萬於其到豫後察看。如該員尚能得力。即著與續行調赴豫省之吳再升一併留營。酌量差委。蔣希夷所部勇丁仍著該撫察看。分別去留。如豫省兵勇已敷分布。即著仍遵前旨。將蔣希夷所部酌撥赴蒙。程大老坎有無下落。前據官文等奏稱。殲斃賊首程姓。是否即程逆弟兄。著即確查具奏。張之萬奏請調前任安徽



寶錄卷八十三  
按察使張學醇著。即准其調營差委。將此由六百里諭知官文。多隆阿。嚴樹森。劉蓉。張之萬。毛昶熙。並傳諭張集馨知之。  
○河南巡撫張之萬奏。遵查宋逆回竄豫境。總兵楊長春等委係帶隊沿途截擊。追入直境。與前次稟報尚無不符。報聞。  
○以山西巡撫英桂為福州將軍。戶部左侍郎沈桂芬署山西巡撫。  
○予故福州將軍耆齡祭葬。諡恪慎。  
○予河南鎮平陣亡千總林宗魁。外委段明。祭葬。世職加等。  
○壬寅。諭內閣。御史富稼奏。近日捐納指省之員弁。皆緣有至契之人。為之引進。日尚浮華。往來宴會。毫不以功名為念。勒捐畝釐。橫加苛斂。書差酷索。較賊尤甚。雖經上控。冤不得申。州縣囊橐飽。

滿。匪兌原籍。有警則焚毀冊卷。檢查無據。所報勦賊獲勝情形。真偽莫測。各上司受其欺罔。遇此等債事失利之員弁。僅參降革留營。不日開復。請飭下各督撫及各路領兵大臣。詳查密訪。按照軍法從事等語。覽其所奏。雖文理未見通暢。尚屬實在情形。文員貪污。武臣退縮。疊經嚴旨申誡。何以此等惡習。尚未肅除。各直省督撫及各路統兵大臣。受朝廷委任深恩。亟宜破除情面。認真整頓。嗣後如有指省分發之員。結黨營私。通同舞弊。苛索釐金。擾累百姓。及聞警逃避。鑽刺留營。為保舉開復地步者。著各該督撫大吏等。指名嚴參。從重治罪。如有瞻徇隱匿。或經朝廷訪聞。或被科道糾參。定惟各

寶錄卷八十三  
督撫及統兵大臣是問。決不寬貸。將此通諭知之。○以刑部右侍郎吳廷棟兼署戶部左侍郎管三庫事。○癸卯。諭內閣。前因薛煥奏。江蘇常熟縣典史莫鍾琳。據該員家屬呈報陣亡。當經奉旨交部議卹。茲據李鴻章奏。咸豐十年八月間。賊犯常熟。該員帶勇抵禦。眾寡不敵。身受多傷。經兵勇搶救得生。傷平後患病經年。繞至通州。始知家屬曾報陣亡。呈請撤銷卹典等語。莫鍾琳既經過救得生。何以遲至數年。始知家屬誤報陣亡。所稱養傷患病之處。殊難憑信。除將該員卹典撤銷外。其有無規避捏飾。仍著李鴻章確切查明。與江蘇失守城池人員案內。一併從嚴參辦。○諭議政王軍機大臣等。

麟慶奏。拏獲著名巨盜暨匪犯聞拏投首各摺片。熱河平泉州回民劉寬。逞兇肆掠。積年巨盜。經麟慶派員緝獲。解至熱河。訊明實係盜首。現交承德府牢固監禁。該犯係著名盜首。且黨與眾多。亟宜速為誅除。以絕巨患。著卽飭令承審各員。卽將該匪所犯各案。嚴訊確供。盡法懲治。迅速了結。為從匪犯。仍著飭令派出委員。帶同番役等密速查拏。毋任一名漏網。其縱盜之地方官。有無賄屬情弊。並著悉心訪查。嚴行參辦。綽金汰聚眾滋事一案。業令投首之那木薩賴。專人覓獲。綽金汰自行赴案矣。綽金汰係案內要犯。務須責令迅速查拏。分別訊辦。不得稍涉懈弛。將此諭令知之。尋奏。劉寬現已。

實錄卷八十三  
訊明正法。據供向在平泉赤峰交界之處藏匿。此拏彼竄。以致久未弋獲。尚無賄脫情弊。惟該州縣等查拏不力。應請交部議處從之。○又諭李鴻章奏無錫各軍擊退大股。援賊連獲大捷一摺。忠侍各悍酋糾率大股。併力回援。冀擾蘇軍後路。經劉銘傳等滾營偪紮。晝夜苦戰。得以大挫其鋒。實屬奮勇出力。惟將士摧堅陷陣。攻勦過勞。而窮寇負隅死守。且訊據賊供。忠逆暫退蘇州北望亭一帶。仍欲繞由許關背後。援應蘇州。是賊黨雖敗。而援蘇之路未斷。李鴻章亟宜乘此兵威大振之時。督飭水陸各軍。併力攻克蘇城。並飭李鶴章、劉銘傳等乘勝進紮。圍攻無錫。使賊首尾不能相顧。則一處得

手。其餘自成破竹之勢。現在聲威正盛。尤當謀出萬全。李鴻章仍須督率各軍。於奮勇之中。力求穩慎。迅奏膚公。同膺懋賞。實有厚望焉。將此由六百里諭令知之。○又諭富明阿奏續報攻勦情形一摺。據稱本月十八九等日。詹啟綸等前偪賊壘紮營。與英翰原紮之營。聯為一氣。截賊糧運。英翰亦在蒙城南門外。搶築三營。又派程文炳等進紮要地。與陳國瑞聯絡應援。僧格林沁派翼長舒通額等。帶馬隊二千名到蒙。國瑞亦於二十三日到蒙。僧格林沁現駐葛家樓。勦辦苗捻各圩。肅清後路。並李世忠攻克中心渡。及李萬春等賊圩。殺賊數千。急圖報國等語。蒙城合圍。賊糧已斷。僧格林沁、國瑞


先後到蒙軍威已振。現在附逆各圩紛紛投誠。實有可乘之機會。著僧格林沁等督飭各軍奮力進取。先解蒙城之圍。仍責令投誠各圩密圖首逆。如能函首來獻。餘黨自必瓦解。或以賊攻賊。令當前敵。而以勁軍繼其後。其真能出力者免罪。優獎。如不出力。立予正法。該親王等務當妥速辦理。以紓朝廷南顧之憂。惟苗逆設計陰狡。僧格林沁等須刻刻防維。不可稍涉大意。李世忠屢克賊圩。殺賊不少。其所部傷亡亦多。著僧格林沁、曾國藩加以獎勵。使其格外出力報效。並令其進取下蔡老巢。使苗逆腹背受敵。以收指臂之效。富明阿另片奏援蒙各軍進剿機宜。咨報僧格林沁彙奏等語。嗣後皖

省攻勦苗捻。各路兵勇及陳國瑞等軍一併統歸僧格林沁節制。以一事權。從此各軍有所稟承。自不難迅奏膚公。剋期蕙事。李世忠立功圖報。其心無他。惟其手下人多有不安本分者。恐該提督有未能查知禁止之處。致為人言所指摘。近日聞有武弁黃銀懷。自稱升用總兵。係李世忠部將。奉委到江西省城提取餉銀。迺購屋娶妻。窩娼聚賭。提刀逞兇。被人呈控有案。又有都司胡冠英、徐鳳和二員。赴新建屬之吳城鎮造船。其文移有管帶豫勝營提督王字樣。此等劣弁。未知是否李世忠部下。著曾國藩飭知李世忠。即將該員等撤回管束。如係冒名提餉造船。即知會江西巡撫將該員拏辦。以

示懲儆。富明阿前奏蒙城被圍。實由唐訓方不能豫先籌顧。又將英翰一軍撤回小澗集。致與城內聲氣不能相聯。使該逆得以乘隙肆志。至今補救為難等語。唐訓方辦理蒙城事宜。是否措置乖方。著僧格林沁查明具奏。原片著鈔給僧格林沁閱看。將此由六百里各諭令知之。○又諭沈葆楨奏籌防西路布置情形一摺。石逆餘黨李幅猷一股。被官兵擊敗。回竄黔粵境內。是江省西南防務。可以稍鬆。惟該逆奔竄靡定。且永甯等縣。有齋匪餘孽。乘機思逞。不可無得力兵勇。扼要駐紮。以備不虞。沈葆楨現因席寶田。江忠義兩軍。請假休息。已檄調普承忠帶兵千人。回顧吉安。並饒防之韓進春一

軍。馳回贛州。相機迎擊。布置甚為周密。著即嚴飭該護鎮等。速將齋匪餘黨。搜捕淨盡。仍隨時確探李逆蹤跡。如再由楚粵東竄。即激勵軍士。協同地方團練。併力兜勦。俾完善之區。該匪無從闖入。方為妥善。該撫因西路有警。不敢拘定假期。現已力疾視事。具見以國事為重。忠蓋可嘉。所稱隨時參酌。以民力補兵數之闕。以吏治為軍政之根等語。洵能洞中窾要。著即振刷精神。力圖整頓。務令治效蒸蒸日上。朝廷紓南顧之憂。方為不負委任。另片密陳李世忠委員黃銀懷來江。索餉。並造船之胡冠英等。形跡均覺可疑等語。本日已諭令曾國藩轉飭李世忠。將黃銀懷等迅速撤回矣。黃銀懷等近

日作何舉動。該撫仍當密飭地方員弁認真查察。毋稍大意。將此由五百里諭令知之。○命荊州將軍富明阿幫辦欽差大臣僧格林沁軍務。○以安徽援勦蒙城捻匪出力。賞協領巴凌阿委參領托雲佈。吉蒙阿。巴圖魯名號。防禦色凌額等。花翎。委防禦台費英阿等藍翎。餘加銜升敘有差。○予浙江包村合門殉難在籍道員田祥祭葬世職。眷屬四十一名口。分別旌卹加等。○緩徵山西薩拉齊廳被水村莊新舊額賦。



大清穆宗繼天開運受中居正保大定功聖智誠孝信敏恭寬毅皇帝實錄卷之八十三



